



Foras na Gaeilge

Scéim na gCompántas Drámaíochta Proifisiúnta agus Amaitéarach 2024

Treoirlínte d'iarratasóirí

Treoirlínte:

Cuireann na treoirlínte seo eolas ar fáil faoi Scéim na gCompántas Drámaíochta Proifisiúnta agus Amaitéarach 2024.

Cuideoidh siad leat:

Cinneadh a dhéanamh an bhfuil d'eagraíocht cáilithe le cur isteach ar mhaoiniú faoin scéim seo

Iarratas a ullmhú ina bhfuil an t-eolas go léir atá de dhíth

Léigh go cúramach iad, le do thoil, sula dtabharfaidh tú faoin iarratas a chomhlánú.

Mar gheall ar an scéim seo

Tá maoiniú á chur ar fáil ag Foras na Gaeilge do ghrúpaí drámaíochta atá bunaithe go dlíthiúil mar chompántas drámaíochta, idir amaitéarach agus phroifisiúnta, grúpaí nuabhunaithe san áireamh, ar mian leo drámaí Gaeilge nó dátheangacha a léiriú timpeall na tíre. Díríonn an scéim seo ar chompántais drámaíochta Gaeilge a bhfuil sé mar aidhm acu drámaíocht na Gaeilge a chothú, a fhorbairt, agus a chur ar fáil d'earnáil na n-ealaíon, do phobal na Gaeilge, don mhórphobal, agus don earnáil oideachais. Lena chois sin, is ar fhorbairt pobail, freastail agus lucht féachána imeachtaí drámaíochta a dhíríonn an scéim seo.

- Is le hairgead poiblí a bhronntar deontais, agus tá dualgais reachtúla ar Fhoras na Gaeilge chun luach ar airgead gach tionscadail mhaoinithe a dheimhniú.
- Molann Foras na Gaeilge d'iarratasóirí cómhaoiniú a lorg le haghaidh tionscadal, nuair is cuí, agus comhoibriú le heagraíochtaí eile leis an luach is fearr a fháil ó dheontas Fhoras na Gaeilge.
- Cuirimid fáilte faoi leith roimh iarratais ó eagraíochtaí atá suite i gceantair aitheanta i straitéisí agus/nó i reachtaíocht rialtais.

An féidir linne cur isteach air?

Le bheith incháilithe le cur isteach ar an scéim seo caithfidh d'eagraíocht a bheith in ann na critéir cháilitheacha seo a leanas a chomhlíonadh;

- Is féidir leis an gcompántas a léiriú gurb iad cur chun cinn na Gaeilge agus soláthar deiseanna úsáide Gaeilge príomhaidhmeanna na ngnéithe den tionscadal a bhfuil an deontas á lorg ina leith.
- Is féidir leis an gcompántas a léiriú go bhfuil gá leis an tionscadal agus go bhfuil luach ar airgead ar fáil ag Foras na Gaeilge, agus go bhfuil stráitéis feabhsúcháin ag an gcompántas maidir le líon na ndaoine a bheidh rannpháirteach, idir bhaill an chompántais, lucht léirithe agus lucht freastail.

Féadfaidh Foras na Gaeilge cur leis na critéir cháilitheacha seo.

Má tá aon cheist agat faoi ghné ar bith de na critéir cháilitheacha, is féidir leat teagmháil a dhéanamh le Foras na Gaeilge roimh an spriocdháta.

Cad é mar a mheasfar na hiarratais?

Úsáideann Foras na Gaeilge critéir mheasúnaithe le hiarratais a mheasúnú. Tá critéir mheasúnaithe na scéime leagtha amach thíos. Measfaimid agus scórálfaimid iarratais de réir na gcritéir seo.

- a) Tá ábhar na ndrámáí, líon an lucht freastail, líon na léirithe agus ionaid na léirithe, samhlaíocht agus nuálaíocht chlár oibre an chompántais chun sástacht Fhoras na Gaeilge.
- b) Tá caighdeán arda ealaíonta bainte amach i scrípteanna, in aisteoireacht agus i léirithe.
- c) Cuirtear le rannpháirtíocht agus cruthaitheacht sa Ghaeilge trí mheán na n-ealaíon.
- d) Tá ábhar bolscaireachta an chompántais i nGaeilge nó iomlán dátheangach, le tús áite ag an nGaeilge, chun sástacht Fhoras na Gaeilge.
- e) Tá cumas bainistíochta agus riaracháin ag an gcompántas, ina gcuirfear taithí agus saineolas an chompántais san áireamh.
- f) Tá eolas curtha ar fáil ag an gcompántas maidir le maoiniú nó tacaíocht eile, e.g. urraíocht, maoiniú comhchineáil agus teacht isteach measta.
- g) Tá luach ar airgead ann maidir le líon na ndaoine a bheidh rannpháirteach, idir bhaill an chompántais, lucht léirithe agus lucht freastail.

Cineál maoinithe ar fáil:

Grúpaí proifisiúnta	Grúpaí amaitéara	Grúpaí nua proifisiúnta
Uasmhéid €50,000/£30,000 Ní mhaoinítear 100% de chostais chlár oibre an chompántais	€12,000/£8,000 Cead cur isteach ar 100% de chostais chlár na bliana	€24,000/£16,000 Cead cur isteach ar 100% de chostais chlár na bliana

Cé atá neamh-incháilithe mar iarratasóir?

- Eagraíochtaí reachtúla agus ceannagraíochtaí
- Aon chompántas a dhéanann stocaireacht faoi iarratas le haon chomhalta boird nó fostaí de chuid Fhoras na Gaeilge

Gníomhaíochtaí atá incháilithe do mhaoiniú tríd an scéim:

- Léirithe trí mheán na Gaeilge nó atá dátheangach ach tús áite tugtha don Ghaeilge
- Forbairt scrípteanna nua
- Forbairt drámaí nua

Gníomhaíochtaí nach bhfuil incháilithe do mhaoiniú tríd an scéim

- Léirithe trí mheán an Bhéarla
- Léirithe laistigh den chlár a bhfuil maoiniú faighte nó iarrtha dóibh cheana féin ó Fhoras na Gaeilge

Riachtanais faoi leith:

- Bunreacht ag an gcompántas
- Árachas dliteanais phoiblí
- Seicliosta um chumhdach cuí comhlánaithe
- Cuntas bainc in ainm an chompántais
- Uimhir chánach ROS bhailí
- Deimhniú imréitigh cánach reatha

Cad é mar a chuirfimid isteach air?

Sula dtabharfaidh tú faoin bhfoirm iarratais a chomhlánú léigh na treoirlínte ina n-iomláine arís agus déan cinnte go gcomhlíonann d'eagraíocht critéir cháilitheacha na scéime thuas.

Ní ghlacfar ach le hiarratais a chuirfear isteach go leictreonach. Ní ghlacfar le cóipeanna crua d'iarratais. Agus tú ag comhlánú an iarratais caithfidh tú gach ceist a fhreagairt.

Is é **12 meán lae Dé Aoine an 26 Eanáir 2024** an spriocdháta le haghaidh iarratas.

Faoin eagraíocht féin atá sé a dhéanamh cinnte go bhfuil an t-iarratas comhlánaithe agus curtha isteach in am. Ní ghlacfar le hiarratais i ndiaidh an spriocdháta thuasluaite.

Má tá aon cheist agat faoi ghné ar bith den iarratais, déan teagmháil le Foras na Gaeilge roimh an spriocdháta

Cad é a tharlóidh dár n-iarratas?

Déanfar gach iarratas bailí a mheas faoi na critéir thuasluaite.

Cealófar aon iarratas ina dtugtar eolas míchruinn.

Is é feidhmeannas Fhoras na Gaeilge atá freagrach as gach cinneadh faoi gach tionscadal atá le maoiniú, agus a chuirfidh gach cinneadh maoinithe i gcrích.

Má éiríonn lenár n-iarratas?

Má éiríonn le d'iarratas cuirfimid tairiscint chugat ina mbeidh gach eolas ábhartha maidir le híocaíocht agus monatóireacht dheontas na scéime.

Conradh dlíthiúil a bheidh sa tairiscint seo agus ní mór cloí le téarmaí agus coinníollacha an chonartha sin. Is féidir go ndéanfar aon sciar den deontas nó an deontas ar fad a chealú nó a aisghairm má sháraítear aon cheann de théarmaí nó choinníollacha an chonartha.

- Ní mór cuntas bainc a bheith ann in ainm na heagraíochta, agus é a bheith faoi stiúir coiste nó boird. Is cóir gach íocaíocht ó dheontas Fhoras na Gaeilge a íoc as an gcuntas seo le go mbeidh cuntas scríofa ar fáil ar gach íocaíocht (e.g. seic, dochar díreach, cárta bainc a bhaineann leis an chuntas, BACS etc.).
- Níl sé ceadmhach cárta pearsanta bainc/cárta Visa nó eile a úsáid agus ní cheadófar aisíocaíochtaí ón gcuntas chuig cárta pearsanta in aon chás.
- Ní chuirfidh Foras na Gaeilge maoiniú ar fáil d'íocaíochtaí a dhéantar le hairgead tirim.
- Ní dhéanfaidh Foras na Gaeilge aon mhaoiniú ar chaiteachas nach bhfuil ceadaithe roimh ré. Ní íocfar aon deontas go siarghabhálach.

Cad é mar is féidir liom aiseolas a thabhairt, gearán a dhéanamh nó achomharc a lorg?

Cuireann Foras na Gaeilge fáilte roimh aon mholtaí nó aiseolas a bheadh agat faoin scéim seo.

Má tá ábhar gearáin agat faoin scéim seo is féidir sin a chur in iúl d'Fhoras na Gaeilge chomh maith.

Tá córas achomhairc i bhfeidhm ag Foras na Gaeilge. Mura bhfuil tú sásta leis an gcinneadh a rinneadh maidir le d'iarratas, is féidir leat athbhreithniú a lorg i scríbhinn taobh istigh de cheithre lá dhéag ó dháta na tairisceana faoin gcinneadh. Ní mór gach iarraidh ar athbhreithniú a bhunú ar na cúiseanna seo amháin:

Go ndearna Foras na Gaeilge míléamh ar an eolas a tugadh i rith an mheasúnaithe.

Gur imigh Foras na Gaeilge, ar dhóigh shubstaintiúil, ón bpróiseas measúnaithe féin.